

# Veir festival da gols

Gion Nutegn Stgier/FMR

**Cun ena clera victorgia da 6:1 cunter Danis/Tavanasa ò igl CB Surses scumanzo igl nov campionadi. Marco mintgamai dus gols on Manuel Simonet e Julian Jenal.**

La davosa fegn d'emda ò scumanzo igl campionadi da ballape 2023/24 pigls teams dalle ligias pi bassas. Chegl vot deir tgi er igl CB Surses ed igl CB Lai/Valbella on gia lour amprema parteida ainten la 4. liga. Igl Sursetters on scumanzo bagn igl nov campionadi cun en success da 6:1 cunter Danis/Tavanasa. La sagonda squadra da Surmeir, Lai/Valbella tgi dat siva dalla promoziun dalla 5. liga ainten la 4. liga ò pers l'amprema parteida e chegl orsoura cunter Lumnezia cun 4:0.

## 3:0 siva l'amprema mesadad

Tigl gi cunter Danis/Tavanasa ò l'equipa indigena surpiglia bagnspert igl cumond segl plaz ed er fatg pressiuin. Gio siva tschintg minutas è crudo igl 1:0 pigl CB Surses, chegl siva d'en corner tratg d'Enrico Carisch. Igl goli sursilvan ò gia disfurtegn cun paler la balla aint igl agen gol. Igl Sursilvans on bagn reagea siva da chel autogol, dantant cun esser la defeisa digls Sursetters stabila è mai propi sto prieveil tgi croda igl ampren gol per Danis/Tavanasa. Ainten la 15avla minuta è en schoz d'Enrico Carisch ia angal per centimeters sur igl gol. Curt sessour ò el gia danovamaintg ena clera schanza da marcar igl 2:0, tgi fiss sto ple tgi mirito. Signia igl sagond gol ò igl CB Surses siva 26 minutas e chegl antras Manuel Simonet tg'ò profito digl pass precis d'Enrico Carisch. Da bellezza alloura igl 3:0 pigl team indigen pacas secundas avant la fegn

**Igl 5:1 da Nico Demarmels siva 73 minutas è alloura sto ensatge pigl igl e mintga amei da ballape.**



Manuel Simonet (dretg) è strusch sto da frenar per igls sies adversaris.

dall'amprema mesadad. Fatg igl gol ò Manuel Simonet, an cumbinaziun cun Giatgen Mitgel Bellini. En schoz da 20 meters exact anmez igl gol da Danis/Tavanasa.

## En gol pigl igl

Cugl resultat intermediar da 3:0 pigl CB Surses è igl gi sto ple u manc decida siva da 45 minutas. Igl Surmirans èn alloura er sa musos siva dalla pòssa dalla sia migra vart e cuntinuo cun giuier offensiv. Ainten la 53avla minuta ò Julian Jenal signia igl 4:0 per la squadra da tgesa e chegl an cumbinaziun cun Manuel Simonet. Ensatge pi tard òn igl Sursilvans signia igl gol d'onour e chegl cun en penalti tratg da Fabio De Giorgi. Gianluca Augustin ò gia taro ingist en attatgader da Danis/Tavanasa ed agl arbirer è rasto pacoter tgi da dar chel penalti cunter igl CB Surses. Igl è mantgea pac tgi Niclo Devonas, igl goli indigen, vess tignia igl schoz. Igl 5:1 da Nico Demarmels siva 73 minutas è alloura sto ensatge pigl igl e mintga amei da ballape. En colp da 22 meters tgi vess betg savia esser pi bel e plazzo pi bagn. Seis minutas pi tard ò Julian Jenal fatg igl 6:1, tigl resultat final, en resultat final mirito cun esser igl adversari per en po pi debel tgi l'equipa victoura.

Plazza d'Ava, Tinizong, 50 aspectatours.

CB Surses: Niclo Devonas, Bernardo Bonifazi, Gianluca Augustin, Corsin Carisch, Robin Demarmels, Giatgen Mitgel Bellini, Mauro Simonet, Enrico Carisch, Ivano Simonet, Manuel Simonet, Mèn Candreia. Reserva: Fabio Stecher, Nico Demarmels, Julian Jenal, Raphael Poltera, Aurel Tscharner, Flurin Demarmels.